



*Minggu, 22 September 2024*  
**Ogen: Sakaria 10:1-12**



**Mekuah Ateku**



**M**ekuah ate e me sada sikap i bas kegeluhen si palasna i bas telu kata kunci e me melihat, tergerak ras bertindak. Kerina ibenaken arah ngenehen/melihat kalak si deban i bas situasi ras kondisinya. Ngenehen ia ras mbukaken diri man bana. Dungna, kalak enda si pediat bengket ku bas pusuhtha si erbansa kita tergerak guna erbahan sada tindakan.

Nggo rusur si begi maka belinen nge perkuah ate Tuhan e asangken rawaNa. Janah i bas rawaNa e pe, rikut ras ukumenNa i je pe si tuhuna lit nge perkuah ateNa. Sabap e kin biak Dibata, perkeleng, perkuah ras nggit ngalemi salah ras dosa manusia. Emaka ikataken Dibata e kekelengen kap. Adi siperdiateken kerna perikopta sendah, maka teridah uga perkuah ate Tuhan nandangi bangsaNa. Tuhan kap si mpeturah sinuan-sinuan alu mahanca embun erkilap dingen udan pe nusur. La ate Tuhan kalak ntah bangsa sideban si merentah bangsaNa sabap Tuhan kap si mada bangsaNa. Emaka ate Tuhan pe mulahi bangsaNa ras mahanca bangsaNa e jadi megegeh tempa-tempa bangsaNa e labo pernah iukum sebab mekuah ate Tuhan kempak bangsaNa. Arah kai si ituriken Nabi Sakaria, maka si tuhuna bangsa Juda ibereken kesempatan kedua guna jadi bangsa Tuhan ija selama enda ia nggo nadingken Tuhan ras lawes ku dibata-dibata sideban. Tapi erkiteken mekuah ate Tuhan, maka bangsaNa e ibahan ntah pe ipelimbarui mulihi bagi si tangtangna mbarenda alu sada syarat mulih kempak Tuhan (Sak. 1:3). I bas kegeluhenta megati kita ngenanami pasang surut kegeluhen i bas kita tutus erkiniteken banci kang kurang tutusna, ibas kita erbahan si mehuli banci kang kita ndabuh ku bas si la mehuli. Amin bage gia si terjadi, ula tadingken Tuhan. Sabap Tuhan e perkuah kap. Janah arah perkuah ateNa tentu kita banci ndatken kemalemen ate ras kejuah-juahen. Emaka lit nge *second chance*, kesempatan kedua gelah ula kita ndabuh ku lubang si seri eme lubang kesalahan ras dosa.